

JOÃO TỸ CARTA HAN MĂN

¹João kófa tỹ rá vễ. Isỹ fi mỹ rán hã vễ, Topê tỹ fi kuprêg kỹ, fi krê mỹ ke gé, hã vỹ: Topê ki ge kỹ nỹtĩ kar, he mũ. Ājag to sóg há tãvĩ nĩ, ha mễ. Kỹ ù tỹ vễnh vĩ há kri fig mũ kar vỹ ājag to há nỹtĩ gé inh mré. ²Vễnh vĩ há vỹ ěg kākā nĩ nĩ, továnh ke tũ pẽ ěg tóg nĩ. Hã kỹ ěg tóg jagnẽ to há nỹtĩ.

³Ěg jóg tỹ Topê mré sóg vēmén tĩ, ti tỹ ājag jagãgtãn jé, ti tỹ ājag tar han jé, ti tỹ ājag krĩ kuprãg jé ke gé. Jesus Cristo mỹ sóg tag to vĩ tĩ gé, ěg jóg mág kósin mỹ. Ti vĩ kri fig ěg tóg tĩ, vễnh vĩ há kri, kỹ ěg tóg jagnẽ to há nỹtĩ gé.

Ěg tỹ jagnẽ to há nỹtĩnh ke

⁴Ā krê kãmĩ ù vỹ vễnh vĩ há nón mũ mũ, jỹ, kỹ tóg inh mỹ sér pẽ tĩ, sỹ tag mẽ kỹ. Ěg jóg tỹ ěg mỹ nén tó ja ěn han kãn sór ag nễji mũ. ⁵Kỹ sóg ā mỹ rán mũ, jỹ. Ā mỹ sóg: “jagnẽ to há nỹtĩmnĩ,” he mũ. Nén ù tãg pijé!, sỹ Ā mỹ nén rán mũ tag ti. Vãsỹ ěg tóg tag mẽ, ěg tỹ ti ki rã vén kỹ. ⁶Ěg tỹ Topê to há nỹtĩnh kỹ ěg tóg Jesus tỹ ěg mỹ nén tó ja ěn han kãn ke mũ sir. Ti tỹ ěg mỹ nén tó vén hã vễ, hã vỹ: “jagnẽ to há nỹtĩmnĩ,” he mũ.

Ũ ag tóg Jesus to ón tĩ

⁷Ũ tỹ hẽn ri ke ag vỹ mũ mũgtĩ, hã ra ag tóg Jesus Cristo to ón tĩ. Ti to ag tóg: “ti pi(jé) ěg ri ke mur ja nĩ!, ěprã ke fi kósin pijé!” he tĩ. Ag ón vễ. Cristo kato tẽ ag vễ. ⁸Vễnh ki rĩrmnĩ, ājag tỹ ag vĩ kri fig tũ nĩ jé, ājag rãnrãj tỹ ājag mỹ tũ! he tũ nĩ jé. Vãsãn nĩ, ājag tỹ tá ti kaja ve jé, Topê tỹ ěg mỹ nén nĩm sór mũ ti.

⁹Ũ tóg Cristo kãme pátén sór mũ, ti vễme pãte tóg ù tó sór mũ. Ti továnh to ken hã vễ. Ũ tỹ ge pi(jé) Topê ki rã kỹ jẽ ha!. Ěg tỹ Jesus kãme mũ mũn kỹ ěg tóg ěg jóg mág ki rã kỹ nỹtĩ, ti kósin ki ke gé. ¹⁰Kejẽn ù tóg ājag tá jun tĩ, hã ra tóg tag tó tũ nĩgtĩ. Kỹ ti mỹ: “inh mré nĩnh kãtũg,” he sór tũg nĩ gé. Ti mỹ: “Topê vỹ Ā ve há han,” he tũg nĩ gé. ¹¹Ěg tỹ ù tỹ ge mỹ: “Topê vỹ Ā ve há han,” hen kỹ ěg tóg ti jykre to: “há ti nĩ,” he mũ gé. Kỹ tóg ěg tỹ ti mré ón mũ ri ke nĩ sir, ěg tỹ ti mỹ vĩ há han kỹ.

¹²Sỹ ājag mỹ nén rán sór mũ vỹ ver e tĩ, hã ra sóg rán kỹ jẽnẽ sór tũ nĩ. Sỹ ājag ki jun sór vễ, kỹ sóg ājag mỹ tó sór mũ, ājag mré vēmén sór isóg mũ, ěg tỹ jagnẽ fe tỹ mrin ke jé.

¹³Ā rẻgre fi krê vỹ Ā mũ ěkrẻg tĩ. Topê tỹ ùn kuprêg mũ fi vễ. Hã vễ, sỹ ājag mỹ nén rán sór mũ ti.